

FRÁSÖGN

af fundi forsætisnefndar Vestnorræna ráðsins í Kaupmannahöfn 10. janúar 2018.

Af hálfu Íslandsdeildar sóttu fundinn Guðjón S. Brjánsson, formaður, auk Bylgju Árnadóttur, alþjóðaritari. Aðrir fundarmenn voru Kári Páll Højgaard, formaður Vestnorræna ráðsins, Aaja Chemnitz Larsen, starfandi formaður landsdeildar Grænlands, Inga Dóra Markussen, framkvæmdastjóri Vestnorræna ráðsins, Elly Hauge, ritari grænlenzku landsdeildarinnar og Høgni Joensen, ritari færeysku landsdeildarinnar. Helstu mál á dagskrá fundarins voru ráðning nýs framkvæmdastjóra ráðsins og þemaráðstefna ráðsins í lok janúar.

Formenn landsdeildanna þriggja sögðu stuttlega frá verkefnum deildanna frá síðasta fundi forsætisnefndar. Guðjón S. Brjánsson, formaður nýkjörinnar Íslandsdeildar, sagðist hlakka mikið til að taka þátt í starfi Vestnorræna ráðsins. Norðurlandasamstarf væri eitthvað sem hann legði mikla áherslu á og löndin stæðu frammi fyrir krefjandi úrlausnarefnum. Inga Dóra Markussen, framkvæmdastjóri Vestnorræna ráðsins, greindi frá starfi ráðsins en hún hættir störfum í lok janúar og verður Vestnorræna ráðið því án starfsmanns í einhvern tíma.

Inga Dóra Markussen kynnti því næst fyrir forsætisnefnd ferli ráðningar á nýjum framkvæmdastjóra ráðsins. Í kjölfar greinargerðar Ingu Dóru af ferlinu fjallaði forsætisnefnd um ráðningarmálin á lokuðum fundi þar sem ákvörðun var tekin um að ráða Sigurð Ólafsson sem nýjan framkvæmdastjóra ráðsins.

Forsætisnefnd ræddi tillögu framkvæmdastjórans um verkefni innan vinnuhóps um sjálfbæra þróun í Norðurskautsráði. Um er að ræða verkefni í samvinnu við rannsóknamiðstöðina Rannsóknir og greiningu um rannsókn á áfengis- og vímuefnanotkun ungmenna á norðurlóðum. Fram kom að meðlimir ráðsins hefðu gert athugasemdir við það að fá ekki að taka þátt í undirbúningi verkefnatillögunnar á fyrri stigum. Fjallað var um mikilvægi þess að ræða málefnið ítarlega á aukaárfundi ráðsins í Ilulissat í janúarlok, þar sem ráðsmeðlimir tækju afstöðu til verkefnatillögunnar. Inga Dóra Markussen sagðist hafa verið í sambandi við framkvæmdastjóra Rannsókna og greiningar um að koma til Ilulissat til að kynna rannsóknina fyrir ráðsmeðlimum. Kári Páll Højgaard, formaður færeysku landsdeildarinnar, lagði til að skipaður yrði vinnuhópur á aukaárfundinum með tveimur fulltrúum frá hverri landsdeild. Í vinnuhópnum gæfist kostur á að ræða málið nánar og velta upp nýjum hugmyndum að verkefnum á vettvangi Norðurskautsráðs. Hann benti á að einn fulltrúi færeysku landsdeildarinnar hefði óskað eftir að ráðið tæki frekar þátt í vinnuhópi um leit og björgun. Aaja Chemnitz Larsen sagði mikilvægt að tryggja þátttöku ráðsmeðlima og fá álit þeirra á verkefninu. Gott væri ef færeysku og grænlenzku landsdeildirnar gætu haldið fund um málið líkt og Íslandsdeild hefði gert. Inga Dóra ítrekaði að þrátt fyrir samþykkt verkefnatillögunnar yrði hægt að vinna að fleiri málefnum innan Norðurskautsráðs. Verkefnið um áfengis- og vímuefnanotkun ungmenna veki mikinn áhuga meðlima Norðurskautsráðs og íslenska utanríkisráðuneytið hefði lýst áhuga á að styðja það.

Farið var yfir dagskrá og þátttakendalista þemaráðstefnu Vestnorræna ráðsins sem halda á í Ilulissat á Grænlandi í janúar 2018. Þema ráðstefnunnar verður „Tækifæri og áskoranir í ferðaþjónustu á Vestur-Norðurlöndum“. Sérstök áhersla verður lögð á sjálfbærni í ferðaþjónustu. Fyrir aukaárfundi Vestnorræna ráðsins samhliða þemaráðstefnunni liggur m.a. samþykkt á ársreikningum ársins 2016 og fjárhagsáætlun fyrir árið 2018, samstarfsyfirlýsing við Rannsóknir og greiningu, umræða um ársfund ársins 2017 og möguleg áheyrnaraðild Inuit Circumpolar Conference að Vestnorræna ráðinu. Einnig munu meðlimir ráðsins ræða hvort leggja eigi niður vinnuhóp um norðurlóðamál sem skipaður var árið 2015.

Fjármál ráðsins voru rædd á símafundi tveimur dögum síðar. Uppgjör ársins 2017 sýnir að ráðið var rekið með rúmlega 10 milljóna króna hagnaði það ár og á ársfundi ráðsins í september

2018 verður tekin ákvörðun um hvernig þeim hagnaði verði ráðstafað. Rætt var um að leggja til að hluti hagnaðarins yrði nýttur til að bæta eiginfjárstöðu ráðsins sem er mjög slæm í kjölfar hallareksturs árin 2015 og 2016. Ráðsmeðlimir ræddu einnig fjárhagsáætlun ársins 2018.

Næsti fundur forsætisnefndar verður samhliða þemaráðstefnu ráðsins í Ilulissat á Grænlandi í janúarlök. Frekari upplýsingar má nálgast hjá ritara Íslandsdeildar Vestnorræna ráðsins og á vefsvæðinu www.vestnordisk.is.